

मार्निंग डोगरी न्यूज़ बुलेटिन, समें. 09.20 Hrs

<><><><><><>

Headlines

- 1- उपराज्यपाल मनोज सिन्हा होरें आखेआ जे आतंकवादिएं खिलाफ कनून तैहत कार्रवाई कीती जाग। उनें आतंकवाद गी रपेआ-पैहा ते समर्थन उपलब्ध करोआने आहलें गी बी खबरदार कीता।
- 2- मुखमंत्री होरें साबका प्रधानमंत्री अटल बिहारी बाजपेई हुंदे जम्मू-कश्मीर च शांति बहाल करने आहले रौं दा समर्थन करदे होई आखेआ जे उंदी दस्सी दी बतै पर टुरिए कश्मीर दे हालात अज्ज मते बेहतर होने हे।
- 3- सुरक्षाबलें बश्मीर दे बांडीपोरा च होए दे टाकरे च आतंकवादी गी मारी मकाया। कुपवाड़ा च इक होर अभियान जारी।
- 4 संसद दा स्यालै आहला इजलास 25 नवंबर थां शुरू होआरदा ऐ।
- 5 भारत दे मुक्केबाज मंदीप जांगड़ा नै वर्ल्ड बाक्सिंग फेडरेशन दा सुपर फेदर वेट विश्व खिताब जिती लैता ऐ।

<><><><><><>

LG-Terrorists

आतंकवाद गी शैह, रपेआ पैहा, समर्थन ते आसरमा उपलब्ध करोआने आहलें गी सौहगा करदे होई उपराज्यपाल मनोज सिन्हा होरें आखेआ जेड़े बी आतंकवादी लोकें गी निशाना बना रदे न, उनेंगी बख्शेख नेई जाग ते उंदे खिलाफ कनून तैहत कार्रवाई कीती जाग। आतंकवाद दी साजिश रचने आहलें खिलाफ खड़ोने पर जोर पांदे होई उपराज्यपाल होरें आखेआ जे सुरक्षाबलें, प्रशासन ते लोकें गी किट्ठे रलिए आतंकवाद दा सफाया करना लोड़चदा। बारामूल च आयोजित राबता-ए-अवाम कार्यक्रम च युवाएं कन्नै गल्लबात दौरान उनें एह गल्ल आखी। राष्ट्र निर्माण च युवाएं दी भूमिका गी उजागर करदे होई उपराज्यपाल होरें आखेआ जे होरनें दुइएं चुनौतिएं दे कन्नोकन्नी युवा नशीले पदार्थ दी माड़ी कबैतू दी मार बी झल्ला रदे न। जम्मू-कश्मीर गी नशीले पदार्थ थां मुक्त बनाने लेई जरूरी ऐ जे युवा अपनी समर्थ गी पंछानन ते अपनी सख्त मेहनत कन्नै अपने कल गी सौआरन। उनें जम्मू-कश्मीर दे युवाएं गी सशक्त बनाने दी सरकार दी बचनबद्धता गी दोहराया। उनें आखेआ जे प्रधानमंत्री नरेंद्र मोदी हुंदी अगुवाई च जम्मू-कश्मीर दे युवाएं दी आसैं-मेदें ते सुखनें गी पूरा करने दे जतन कीते जा'रदे न।

JK-Assembly Day-2

जम्मू-कश्मीर विधानसभा दे पैहले इजलास दे कल दुए रोज 52 साबका मिम्बरें गी श्रद्धांजलि दिती गई जिंदी पिछले किश असें दौरान मौत होई गई ही। इस दौरान मुख्यमंत्री उमर अब्दुल्ला होरें साबका प्रधानमंत्री अटल बिहारी बाजपेई हुंदा चेचे तौरा पर जिक्र करदे होई जम्मू-कश्मीर च रमानदारी, अमन-बहाल करने गितै उंदे नजरिए ते जत्नें गी चेता कीता। मुख्यमंत्री उमर अब्दुल्ला होरें आखेआ कि जेकर अटल बिहारी बाजपेई हुंदे आसेआ दस्सी गेदी बतै पर टुरेआ गेदा होंदा ते जम्मू-कश्मीर दे हालात भलेआं बक्ख होने हे। बाजपेई हुंदे आसेआ दिते गेदे “जम्हूरियत”, इंसानियत ते कश्मीरियत दे नारे गी दोहरांदे होई उमर अब्दुल्ला होरें आखेआ जे ओह चुनौतिएं दे बावजूद बी दोस्ती दा हत्थ बधांदे रेह ते कुसै बी मुद्दे दे हल्ल लेई उनें सदा गै गल्लबात दी हिमायत कीती।

<><><><><><>

Terrorist-Killed

जम्मू-कश्मीर च सुरक्षा बलें जंदी रातीं उत्तरी कश्मीर दे बांडीपोरा जिले दे जंगली इलाकें च इक सांझा तपाशी अभियान चलाया। इलाके च आतंकवादिएं दे छप्पे दे होने दी सूह थोने मगरा एह अभियान चलाया गेआ। फौज दी चिनार कोर दे प्रवक्ता नै सोशल मीडिया मंच एक्स पर इस गल्लै दी तसदीक कीती जे फौज, जम्मू-कश्मीर पुलिस ते सीआरपीएफ नै कैटसन जंगली इलाके च घेराबंदी ते तपाशी अभियान शुरू कीता। उनें इस कार्रवाई च इक आतंकवादी देमारे जाने दी बी तसदीक कीती ऐ। प्रवक्ता मूजब जिसले सुरक्षाबलें दी सांझी टीम संदिग्ध इलाके गी खंगाला करदी ही तां आतंकवादिएं उंदे पर गोलियां चलाइयां। सुरक्षाबलें बी तुरत परते आहली कार्रवाई कीती जेदे च इक आतंकवादी मारेआ गेआ। उआं खीरी जानकारी थोने तगर सुरखाबलें दा अभियान जारी हा ते इस बारै होर ब्यौरे गी बलगेआ जा करदा ऐ।

<><><><><><>

Army-Commander

फौज दी उत्तरी कमान दे अध्यक्ष लेफ्टिनेंट जनरल एम.वी सुचिंद्र कुमार होरें कल राजौरी दा दौरा कीता ते जम्मू-कश्मीर दे इस सरहदी जिले च बलें दिएं कारवाईएं सरबन्धी तैयारिएं दा निरीक्षण कीता। लेफ्टिनेंट जनरल कुमार हुंदा राजौरी च डेरा गी गली दा एह दौरा उंदे अखनूर दौरै दे इक रोज बाद लगगा ऐ जित्थे 28 ते 29 नवंबर गी दऊं दिनें तोड़ी चली दी कार्रवाई दौरान त्रै खतरनाक आतंकवादी मारे गे हे। उत्तरी कमान प्रमुख होरें मगरा अपने सोशल मीडिया प्लैटफार्म “एक्स” पर उत्थे तैनात

सैनिकें दी हिम्मत, दलेरी ते जज्बे दी बड़ी मती सराहना कीती जेहड़े अपनी पेशेवराना महारत ते समर्थ दा शानदार प्रदर्शन करदे होई अपनी ड्यूटी अंजाम दिंदे न।

<><><><><><>

CS-Ayushman

मुख्य सचिव अटल डुल्लू होरें सेहत ते मेडिकल शिक्षा मैहकमे गी हिदायत कीती जे ओह आयुष्मान भारत दे बकाया पेदे मामलें दा दिसंबर थ्वां पैहले नेबड़ा करै, एहदे राएं लोकें गी सेहत सुविधा दिती जंदी ऐ। उनें मैहकमे गी नमें अस्पतालें गी बी एहदे तैहत पैनल च आहनने लेई आखेआ। सेहत ते मेडिकल मैहकमे दी जायजा बैठक दौरान जानकारी दितती गई जे 15 मार्च थ्वां अजें तगर 2 लक्ख 65 जहार पैहले थ्वां मंजूरिया दितियां गेइयां न ते 2 लक्ख 51 जहार 487 दावें गी अदायगी लेई जमा करोआई दितता गेआ ऐ। मैहकमे दे सचिव डॉ. सईद आबिद रशीद शाह होरें जानकारी दिती जे डायलीसिस ते होर दुहएं सर्जरीज़ आहलें गी आयुष्मान भारत तैहत तरजीह दिती गई ऐ।

<><><><><><>

Winter Session

संसद दा स्याले आहला इजलास 25 नवंबर गी शुरू होआ रदा ऐ जेहड़ा 20 दिसंबर तोड़ी जारी रौहग। संसदीय मामलें दे मंत्री किरण रिजिजू होरें अपनी इक सोशल मीडिया पोस्ट पर जानकारी दिती ऐ जे 26 नवंबर गी संविधान दिवस दी 75मीं बरे गंड दे सिलसिले च संविधान सदन दे केंद्री कक्ष च इक कार्यक्रम दा आयोजन कीता जाग। 26 नवंबर 1949 गी भारत दी संविधानसभा नै संविधान गी अपनाया हा ते 26 जनवरी 1950 गी इसी लागू कीता गेआ हा।

<><><><><><>

Jal-Utsav

नीति आयोग जल प्रबंधन संरक्षण ते निरंतरता दे बारै च जागरूकता ते संवेदनशीलता पैदा करने लेई अज्ज 15एं दिनें दे जल उत्सव गी शुरू करोग। एह अभियान प्रधानमंत्री नरेंद्र मोदी हुंदे इस विचार कन्नै प्रेरित ऐ जे 'नदी उत्सव' दी तर्ज उप्पर 'जल उत्सव' बी मनाया जाना लोइचदा। मोदी होरें पिछले साल दिसंबर च आयोजित त्रीए सचिव सम्मेलन च एह गल्ल आक्खी ही। नीति आयोग नै इक वक्तव्य च आखेआ जे जल उत्सव 6 थमां 24 नवम्बर दे दौरान 20 आकांक्षी जिलें ते ब्लॉक च

मनाया जाग। 20 राज्यें च चलाए जाने आहले इस अभियान च जल संसाधनें लेई संरक्षण ते सुरक्षा च सामुदायिक सह-भागीदारी पर जोर दिता जाग।

<><><><><><>

Tourism

सैलसफा ते खातर तवज्जो सरबंधी क्षेत्र कन्ने जुड़े दे लोके कश्मीर घाटी च पेश आवा'रदिएं आतंकी घटनाएं दी सख्त निंदेआ कीती ऐ तो आखेआ ऐ जे सैलसफा उद्योग घाटी च रमानदारी ब्हाल करने लेई सरकार गी हर चाल्ली सहयोग देने लेई पूरी चाल्ली बचनबद्ध ऐ। कल श्रीनगर च इक प्रेस कांफ्रेंस गी संबोधित करदे होई सैलसफा कन्ने जुड़े दे संगठनें दे कारोबारी लीडरें आखेआ जे ओह घाटी च रमानदारी चाहंदे न ते लोके दा मारेआ जाना ते अर्थ बवस्था दा नुकसान कदे बर्दाश्त नेई कीता जाग। जम्मू-कश्मीर होटलियर्स एसोसिएशन दे चेयरमैन मुश्ताक चाया होरें आखेआ जे ओह घाटी च रमानदारी ते खुशहाली चाहंदे न ते आतंकी घटनाएं दी सख्त निंदेआ करदे न। जियां जे पैहले बी खबर दिती जाई चुकी दी ऐ जे ऐतवारें, श्रीनगर दे टीआरसी इलाके च ग्रेनेड हमले च 11 जनें जख्मीं होई गे हे। औहदे पैहले बी नमीं सरकार बनने दे बाद पेश आई दिए वारदातें च गैर मकामी लोके गी नशाना बनाया गेआ ऐ।

<><><><><><>

CJ-Samba

जम्मू-कश्मीर ते लद्दाख हाई कोर्ट दे चीफ जस्टिस ताशी रबस्तान होरें कल जिला अदालत परिसर साम्बा दा दौरा कीता ते उत्थे चला'रदे ढांचागत सुविधाएं सरबंधी प्रोजेक्टें दे कम्में दा निरीक्षण कीता। एहदे अलावा उनें अदालतें च बकाया पेदे मामले दे बारे च बी जानकारी हासल कीती। दौरे दौरान मुख न्यायाधीश होरें कम्में गी तोड़ चाढ़ा रदिएं एजेंसिएं गी निर्देश दिता जे ओह इनें परियोजनाएं गी मित्थे गेदे समें दे अंदर-अंदर मुकम्मल करना यकीनी बनाने लेई कम्मै दी रफ्तार च तेजी आहनन तां जे कम्में दे लटकने कारण इंदी लागत खर्चे च बाददा नेई होऐ। इस मौके जस्टिस रबस्तान होरें समाज कल्याण मैहकमे आसेआ ताले गेदे किश दिव्यांग लोके गी विशेष स्कूटर ते व्हील चेयरां बी सौंपियां।

<><><><><><>

HADP-Ramban

पशु पालन मैहकमा रामबन, भिड्ड पालकें दी मदद लेई शुरू कीती गेदिएं केंद्र आस्सेआ प्रायोजित स्कीमें गी उंदे तगर पजाना यकीनी बनाने लेई केई जत्न करा करदा ऐ। राईबाई ते एहदे नै जुड़े दे होरनें क्षेत्रे दे पूरे-पराते विकास सरबन्धी एच.ए.डी.पी स्कीम तैहत मैहकमे नै उत्थूं दे दऊं करसान सहायता केंद्रें च भिड्डें गी कतरने आहिलयां त्रै मशीनां उपलब्ध करोआइयां गेदियां न जिंदी मदद कन्नै भिड्ड पालक बड़े सखल्ले भिड्डां मुन्नी सकदे न। आकाशवाणी दे रामबन आहले जिला संवाददाता अजयदीप सिंह कन्नै इस बारे गल्ल करदे होई जिला भिड्ड पालन अधिकारी डॉ. शबीर अहमद खान होरें दस्सेआ जे नमिएं तकनीकें गी अपनाने कन्नै मजूदा समें च उन्न उत्पादन बधिए 1 लकख 73 जहार किलोग्राम तोड़ी पुज्जी गेदा ऐ।

<><><><><><>

Boxing

भारती मुक्केबाज मंदीप जांगड़ा नै केमैन आइलैंड्स च वर्ल्ड बाक्सिंग फेडरेशन दा सुपर फेदरवेट विश्व खताब जिती लेता ऐ। उनें कल सब्बनें दी सैहमति कन्नै लैते गेदे फैसले च ब्रिटेन दे कोनोर मैकिन्टोश गी 10-0 कन्नै हराया। एहदे कन्नै गै मंदीप कुसै बी प्रो बाक्सिंग इवेंट श्रेणी च विश्व चैपियन बनने आहले पैहले भारतीय मुक्केबाज बनी गे न। 2014 ग्लासगो राश्ट्रमंडल खेड्डें च चांदी दा तगमा जितने आहले मंदीप गी अपने पेशेवर करियर च हुनै तगर छड़ी इक गै हार झल्लनी पेई दी ऐ। उनें अपने 12 मुकाबलें चा 11 जिते न जिंदे चा 7 नॉक आउट जिते हे।

<><><><><><>